

04 JUN 1998

Mahathir-matawang

MATAWANG BERSAMA ASIA SUKAR DILAKSANAKAN, KATA DR MAHATHIR

Oleh: Michael Raj

TOKYO, 4 Jun (Bernama) -- Perdana Menteri Datuk Seri Dr Mahathir Mohamad berkata idea satu matawang bersama Asia untuk urusan niaga, sebagai jalan keluar daripada krisis ekonomi, adalah sukar untuk dilaksanakan.

Sungguhpun negara-negara serantau telah terjejas teruk oleh ketidaktentuan matawang, ia bukan sesuatu yang boleh dilaksanakan dengan mudah, katanya semasa menjawab soalan sama ada terdapat keperluan mengadakan satu matawang bersama Asia seperti Euro untuk membantu memulihkan ekonomi serantau.

"Akan ada banyak pro dan kontra mengenai idea itu. Ia mungkin mengambil masa yang lama sebelum menjadi kenyataan tetapi terdapat cara-cara lain bagi negara-negara Asia untuk berdagang tanpa perlu mencari satu matawang bersama," katanya.

Beliau berkata demikian semasa sesi soal-jawab pada persidangan antarabangsa Nikkei bertemakan "Masa Depan Asia" di sini, dengan beliau diminta mengulas mengenai pelbagai isu.

Kepada soalan mengenai bagaimana peniaga-peniaga matawang boleh dikawal daripada mengakibatkan kerosakan kepada negara-negara melalui aktiviti spekulatif mereka, Dr Mahathir berkata negara-negara di mana mereka tinggal patut bersetuju sedikit untuk menyekat atau mengawal selia mereka walaupun jika mereka beroperasi di luar pesisir.

Dr Mahathir, secara menyindir, juga berkata: "Di dalam orde baru ekonomi dunia, mereka yang mempunyai paling banyak wang kini jangan dihalang dengan apa cara pun, walaupun jika mereka mencetuskan pemberontakan, mengakibatkan berjuta-juta orang menganggur, itu tak apa.

"Ini adalah hak perdagangan bebas sekiranya itulah falsafah dunia dan diterima oleh setiap orang, maka kita akan mendapat kegawatan ekonomi dan kemudahrupaan matawang selama-lamanya."

Dr Mahathir, yang sedang dalam lawatan kerja lima hari ke Jepun, juga berkata Jepun pasti memperolehi keuntungan daripada pelaburan yang semakin cepat memasuki Malaysia kerana ia boleh membantu Tokyo pulih daripada kemerosotan ekonominya sendiri.

Perdana Menteri berkata pelaburan Jepun, sama ada dalam keupayaan produktif atau di dalam projek-projek pembiayaan pembangunan infrastruktur, boleh membantu Malaysia pulih daripada krisis matawang itu.

"Sebuah Malaysia yang makmur hasil daripada pelaburan seumpamanya, sebaliknya akan menjadi pasaran yang amat baik dan secara tidak langsung akan membantu pengeksport-pengeksport Jepun untuk pulih," katanya.

Bagaimanapun, beliau kesal terhadap pengunduran Jepun daripada skim membantu negara-negara Asia Tenggara yang bermasalah yang terjejas oleh krisis matawang, selepas ia menunjukkan keghairahan pada mulanya.

Sungguhpun ia bersedia untuk memberi AS\$50 bilion, Dr Mahathir berkata Jepun mengalah setelah menerima tekanan daripada pihak-pihak tertentu yang mendakwa bahawa bantuan Jepun akan menghapuskan keberkesanan bantuan Tabung Kewangan Antarabangsa (IMF).

Dr Mahathir turut mengulas mengenai Koridor Raya Multimedia (MSC) dan berkata bahawa Malaysia sedang mengambil langkah-langkah untuk meningkatkan keupayaan sumber manusia dalam menggerakkan pembangunan teknologi tinggi.

Beliau berkata bilangan jurutera yang di negara pada masa ini adalah tidak mencukupi dan "kami telah memulakan program untuk melahirkan kira-kira 7,000 orang jurutera setahun."

"Tiada negara di dunia mempunyai jurutera yang cukup, sama ada di dalam

multimedia atau teknologi maklumat tetapi berita baiknya ialah bahawa kami telah membuka pintu kepada jurutera-jurutera asing yang boleh bekerja tanpa sebarang sekatan di dalam MSC, tidak seperti sektor-sektor lain."

Dr Mahathir berkata, "Kami menjangka menarik agak banyak jurutera asing yang akan bekerja di dalam persekitaran yang serupa betul dengan di negara sendiri sambil kami mulai melahirkan lebih banyak jurutera."

Mengenai kemungkinan penapisan di dalam MSC, Perdana Menteri berkata tidak ada penapisan Internet dibuat kerana sesiapa sahaja boleh memuatkan apa-apa pun di dalam jaringan itu.

"Tidak ada cara untuk menyekat mereka, sebarang percubaan tidak akan berkesan. Misalnya, apa akan berlaku jika kita tidak suka seks di dalam web, dan kita pun mewujudkan perisian yang membuang perkataan "seks" daripada Internet. (Jadi) semua daerah Inggeris seperti Middlesex dan Sussex tidak akan dipaparkan di dalam Internet," katanya, yang mencetuskan gelak ketawa daripada lebih 200 peserta pada simposium itu.

Bagaimanapun, katanya Malaysia akan terus mengamalkan kebebasan akhbar berasaskan kepada tanggung jawabnya untuk melindungi kestabilan sosial, ekonomi dan politiknya, terutamanya daripada konteks masyarakat pelbagai kaum.

Kepada satu lagi soalan mengenai bahaya keupayaan produktif yang berlebihan di negara-negara Asean yang terlibat dalam aktiviti-aktiviti ekonomi yang serupa seperti besi dan keluli serta industri pembuatan kereta, dan sama ada ini boleh mengakibatkan satu lagi krisis, beliau berkata:

"Ya, memang ia akan menyebabkan satu lagi krisis, tetapi tahapnya tidaklah sebegitu besar kerana sedikit orang akan jatuh, tetapi tidak akan berlaku sebarang keburukan kepada yang lain sebaliknya ia akan memberi pengajaran kepada orang lain.

"Tetapi bahaya yang lebih besar ialah sekiranya cuma terdapat segelintir syarikat keluli besar di dunia dan apabila runtuh mana-mana antara mereka akibat tidak bersetuju untuk mengawal pengeluaran, penutupan mereka akan membawa bencana yang besar."

Keadaan sukar yang sama menunggu bank-bank besar yang mempunyai aset melebihi AS\$600 juta, yang boleh menyebabkan pengeluaran wang di seluruh dunia jika ia gagal dan mungkin tidak pulih, katanya sambil mengibaratkannya seperti cerita "humpty dumpty" yang apabila ia jatuh "semua pengikut raja tidak dapat mencantumkanannya seperti sediakala."

"Di negara saya, kami telah melihat banyak kemuflihan tetapi kerana syarikat-syarikat itu kecil, ia tidak mengakibatkan seluruh negara menjadi muflis," katanya.

Beliau berkata: "Kita terpaksa berhati-hati untuk menjadi terlalu besar."

-- BERNAMA

MR SHY OS NAK